

Fundeshinan Kibrá

"Nos mester intensivá e bataya kontra kriminalidat, violensia, i droga! Nos mester pone un páro na e dekadensia moral den nos komunidad!" Kada dia nos ta tende e mésun preokupashon ekspresá pa un bisiaña, kolega, komersiante, hues, médiko, polítiko, taksista, dosente, amtenar, peon, gobèrnante, pastor, ama di kas, i asta e turista. Tur ta preokupá pa e situashon aktual.

Ta remarkabel ku hopi líder den diferente gremio di nos komunidad ta konsiente ku rais di nos problema ta spiritual i moral. Ma tòg mayoria ta buska OTRO solushon: traha mas fasilidat pa rekreo, mihó edukashon, mas polis, èts. Maske mas fasilidat, mas pèrsonal, i mas sèn por ta un yudansa, nan ta solamente un plèister riba e kanser.

Ta tempu pa nos hasi mas ku solamente REKONOSE ku nos kas ta kai pasobra su fundeshi ta tur kibrá. No ta malu pa fèrf dak, drecha kranchi, òf pega mosaiko nobo. Ma ora e kas ta kèntel, loke ta urgente ta pa drecha e fundeshi! Palabra di Dios ta hasi un pregunta retóriko apropiá: "Si e fundeshinan wòrdu destruí, kiko e hustu por hasi?" (Salmo 11:3). Ta tempu pa nos DRECHA E FUNDESHI—trata ku nos problemanan moral i spiritual—promé ku henter e kas kai.

Nos gobèrnanenan sigur por duna un man pa drecha e fundeshinan. Nan mes mester duna un ehèmpel. Nan por inisiá leinan hustu i para riba ku suidadanona i bishitantenan na nos isla ta obedesé nan. Nan por protehá nos komunidad di sierto influensia malu.

Ma en realidat, nos ta gaña nos mes si nos ta kere ku nos gobèrnanenan por solushoná e problemanan ku nos komunidad ta eksperensia. Nos mes ta responsabel. Kada suidadano di nos isla mester hasi su parti. I e parti ei ta kuminsá ku e famia. Pa nos por tin un komunidad fuerte, nos mester tin famianan fuerte; i pa famianan por ta fuerte, mester tin parehanan fuerte, prinsipalmente e esposo.

Un di e motibunan prinsipal ku nos isla ta eksperensia tantu dekadensia moral ta pasobra mayornan ta negleshá di siña nan yunan balornan spiritual i moral. Skritura tin rason: "No gaña boso mes, Dios no ta laga ten'E di bofon. Pasobra kiko ku hende planta lo e kosechá tambe" (Galationan 6:7). Nos ta den temporada di kosecha na nos islanan. Nos ta kosechá loke nos a planta den nos yunan...yunan ku ta lamta sin balornan, sin sa kiko ta bon i kiko ta malu.

Beibel ta kontené e mihó preskripshon pa moralidat: e Dies Mandamentunan. Antes, e mandamentunan aki tabata grabá den memoria di kada mucha. Ma kua hóben awendia por lista tur dies fo'i kabes? 1) Bo no mester tin otro dios Mi dilanti. 2) No traha pa bo mes ningun imágen. 3) No usa nòmber di SEÑOR bo Dios pòrnada. 4) Kòrda e dia di sabat, pa santifik'é. 5) Onra bo tata i bo mama. 6) No mata. 7) No kometé adulterio. 8) No hòrta. 9) No lamta testimonio falsu kontra bo próhimo. 10) No kudishá. Si nos ke mira un kambio den moralidat den nos komunidad, mayornan mester biba konforme ku e étika aki i siñ'é na nan yunan. (Dosentenan por pone e "Dies Mandamentunan" den kada klas na skol).

Un otro motibu ku nos komunidad ta eksperensia e trastorno ku e ta hañ'é aden ta pasobra parehanan, tantu e esposo komo e esposa, a bandoná Dios. Nos no por eksperensia Dios Su bendishon ora nos ta lubid'E! Un estadística ta ilustrá esaki. Na un pais, 1 di kada 2 pareha eventualmente lo divorsia. Ma segun e sífranan na e mésun pais ta indiká, ora parehanan ta hasi orashon huntu, ta lesa Beibel huntu, ta bai iglesia huntu, solamente 1 for di 300 pareha ta divorsia. Dios ta bendishoná esnan ku ta pon'E promé den nan bida!

Ademas mayornan mester siña Palabra di Dios regularmente na nan yunan. "E palabranan aki, ku mi ta ordenábo awe, mester ta riba bo kurason; i bo mester siña nan kuidadosamente na bo yunan, i mester papia di nan ora bo ta sinta den bo kas, ora bo ta kana riba kaminda, ora bo ta bai drumi, i ora bo ta lamta" (Deuteronomio 6:6-7).

Nos tur ta preokupá pa e dekadensia ku nos isla ta eksperensia. Ta tempu pa nos stòp di papia tokante e problema i kuminsá aktua. Ta tempu pa kada pèrsona, pareha, i mayor stòp di fèrf dak di kas i kuminsá drecha e fundeshi.